

主編 黃靈庚 陶誠華

上海古籍出版社

金華宗譜文獻集成
10

主編 黃靈庚 陶誠華

上海古籍出版社

金華宗譜文獻集成

10

目錄

金華宗譜文獻集成（東陽宗譜五） 東陽市委宣傳部編

單國爐輯

韋

一

東陽東眷韋氏宗譜

一

徐

一九九

東陽三元徐氏宗譜

一九九

許

三〇七

東陽昭仁許氏宗譜

三〇七

葉

五〇九

東陽象山葉氏宗譜

五〇九

韋

東陽東眷韋氏宗譜

元至元庚辰輯修原序

吾韋氏世爲京兆杜陵人漢唐時名宦大儒載諸史冊及著諸詞賦者不可枚舉漢丞相扶陽侯裔孫諱曰潛號西眷諱曰穆拜安城侯號東眷我始祖參軍公諱履淳者安城侯嫡派也登唐開元己巳進士官丞相府都事秉性忠直不事權奸天寶末以謫官量移婺州遂居東陽至朝之曾祖諱希顏官國子助教者始韋氏之世系不再傳竟爲祝融氏所奪累朝封贈誥敕俱付一炬甚可悼也幸祖宗呵護世系舊草尚有存者先大父欲輯未果一日出五殘以□朝曰吾氏稱巨族惟此一綫不知何日能彙祖祖孫孫而編成全帙也言訖淚下朝聞之不勝哀痛嗟乎嗟彼泉水尚溯其源翳彼平林必窮其本矧身爲孫子可不知祖宗之所自來也哉因細參舊稿質之史傳採訂前後上下次序信者筆之疑者闕焉不敢妄爲補綴于是變繕寫爲劄劄規制煥然一新庶先大父之志有未逮者藉以稍慰矣由助教公推而上之亦藉以共慰矣即後之子孫開卷之餘如接前人於室而數百年之祖功宗德皆瞭然在目亦無不可以其慰矣然是役也豈朝小子自爲亦先大父之成命是稟後之人有能本尊祖敬宗之意爲敦倫睦族之思聚萬派於一宗越十年而再續則氏族世

系綿遠無窮吾知先大父又將破淚爲笑豈不快哉豈不休哉詩曰高山仰止景行行止爲孫者其勗諸十七世孫朝謹識

明正統辛酉重修原序

韋氏古顯帝裔也自漢唐時代有名人唐參軍履淳公係京兆杜陵東吞安城侯之裔少登甲第官丞相府都事性鯁直不阿時好當天寶之亂以貶謫量移東陽遂卜居焉至宋諱曰儒諱曰惠諱曰稱諱曰希蘭諱曰希顏希容宗華等俱以經術顯今沐陽令兆淇郎諱儒者之九世孫也以歲進士貢人成均介其姻親馬君子賢持斯譜謁予爲序夫譜牒之作所以明世系之本源別子孫之支派合恩義於族人崇尊敬於宗祖所係豈細故哉今觀韋氏之譜自一世以抵於今凡十九世可謂詳矣自參軍公爲東陽始遷之祖可謂□其實矣予謹述其所從來俾其子孫知世德之遠思所以振揚其聲華者必有人焉而沐陽公之徵予爲序亦非徒尚其世而已於是乎書時明正統辛酉月之吉賜進士出身國子監祭酒兼翰林院侍講篆修國史廬陵胡儼撰

正統辛酉重修原序

韋氏宗譜一帙宋助教公諱希顏者之所創元處士宗文公之所續今沐陽令兆淇之所修也爲卷三爲圖二詩文附錄者凡若干篇大約首自贈遺唐始遷之祖參軍公諸作暨歷代之名人銘誌傳記詩章凡有關於忠孝節義者悉載之以爲後嗣勸不敢僞也亦不敢遺也殫心考訂其有古史傳信之意乎韋君兆淇與余姻戚郭君仲南

交甚契以譜牒告成爲徵序於余且曰韋君新除沐陽令不日之官矣生平誼篤宗盟今修續業有成勞祈數言以嘉乃志且爲之勸駕可乎予曰唯唯是正仁人孝子之用心也古人自飲食草木以至方技之末莫不有譜況一宗世系其尤大者乎韋君可謂知所本矣雖然士君子躬行孝悌處爲鄉望出爲民表豈直家政云乎哉推敦本之意以臨民則仁讓可興風俗可厚異日化行治美稱循良而書上考者端必由此也韋君之政吾於是乎卜之矣昔君陳篇言惟孝友于兄弟而孔子引之曰是亦爲政明乎家政之先乎國政也予故應郭君之徵重嘉其仁人孝子之用心而預決其化民成俗者有如此賜進士出身奉政大夫通政司右參議前吏科給事中蘭谿龔全安撰

弘治丙辰重修原序

予嘗習舉子業與東陽韋氏子鼂講求文學托交既久其尊翁諱公應者率子姪輩見予皆恂恂雅飭予竊嘆曰詩書之澤所以啟後人而光先業者吾於韋氏徵之哉一日鼂偕諸君子出宗譜示予且告曰吾宗譜自十七世祖宗文公修輯之後從叔祖諱兆洪叔父諱泰者已一再續矣迄今又若干年子孫衆多或失其序因謹爲重輯幸已藏事願乞一言以光篇首予思韋氏始祖參軍公自唐天寶間量移東陽其子孫因占籍爲東陽人至今二十有餘世矣詩禮相承簪纓勿替稱望族者咸以韋氏爲最昔京兆家聲去天尺五代以文章功業顯今其遺澤尚存諸君子韋修厥德模範先型栽培固而枝葉茂郎與青史爭光可也夫譜牒一家小史耳亦何足爲韋氏羨然宗

法不墜實賴乎此續修之舉正仁人君子敦睦之深心也敢不敬而述之慈谿陳復錦拜撰

嘉靖甲申重修原序

譜牒者古世家小史也氏族立而宗法廢士大夫能存乎大宗而徵諸文獻者百無一二焉宋儒廬陵眉山二公始定譜法蓋取五服九族之義也夫服族之義雖有親疏之殺而推其所自即至百代之遠服有盡而情無窮統系族屬莫善於此東陽韋氏世爲京兆杜陵人唐天寶間參軍諱履淳者出自彭城敬公之後始以謫官家於東李青蓮贈詩三首直聲勁節彪炳千古不可得而掩也作述相承蓋二十餘世矣或仕或隱出處不一宋助教公首編家譜至元十七世孫諱朝者修輯之繫一族之子姓俾昭穆詳明上下循序支分派別各有條貫而家法立矣十九世孫兆洪公由明經貢入太學宰沐陽志篤宗盟敷揚盛美能使數百年之流風餘韻煥然一新而又徵諸當代巨筆以序之其尊祖睦族之心至今猶可想見也弘治初孟滔公蔭又爲考正今年夏孟滔子柱暨其弟棟姪初輩敬循其舊重爲參正之昔晦庵先生有云譜十年不修則爲野人東邑石洞書院爲葉水心魏鶴山諸公講學之區當時朱子避居是邦學庸註釋脫稿猶存韋氏素稱禮義由其親炙日久故醇厚雍睦久而彌光焉因不揣鄙陋爲之書其概以俟後之文士餘姚鄭時撰拜

嘉靖甲申重修原序

三代之時天子建德因生以賜姓諸侯率以姓顯迨秦郡縣天下而

諸侯失國者多有以國爲氏是以中原著姓非天子胄則諸侯後也降及晉魏以門第取士當國危亂中原多兵革之禍而權奸貶斥忠良率在東南諸州時以爲遠外而不知遐方僻壤非用武地名山佳水又足以相忘於兵革於是中原著姓始蔓衍於東南東陽之有韋氏其一也韋之先出自顓頊孫大彭后夏少康封其別孫劉累於豕韋周赧王時失國徙彭城氏國曰韋傳至伯遐其孫孟爲漢楚王傅孟四傳曰賢者徙京兆之杜陵延至穆十傳而生鴻川封彭城敬公其裔孫諱履者即東陽始遷之祖也登唐進士任丞相府都事楊國忠以其有時名不爲己用謫朱崖尋以恩重移婺州法曹參軍輔親王挺時中國值安史之變迨肅代不振而吾婺山川修阻足以避亂至德丁酉挺進封涇王去婺履淳以量移故令不得內徙已而其從子友信來守婺有所賴藉因留連吾婺者久之其官職姓字詳載郡志大歷中戴公叔倫宰東陽素善履淳迺寓東陽龍泉坊卒葬邑治北其子友直遂定居是坊爲東陽人人傳曰儒者登宋崇寧進士任承事郎判糧料院事從宗忠簡公留守京城儒元孫希顏淳祐遙土官助教協修國史賜建文星坊於邑治之東今韋氏發祥之基址也當宋季世時方不競不樂爲仕進宋亡槩不出仕以取榮是以韋氏世濟隱德往往以行義著聞於鄉先是助教公手編一譜以火逸比鄰徐氏曾孫朝具金往贖不盡全公又出世系舊草於故笈中雖非完璧其本源名諱幸不至於盡然避徙蘭江改姓柳氏之由蔑以考矣處士振而葺之聞知者徵諸古見知者質諸今上溯其源下究其流皆處士公之力也處士從孫沐陽令兆洪總輯一十九世小傳以詳一族之行實苦心孤詣博採廣搜其亢宗之力幾與前輩等距

今百有餘年凡一再修慙不敏敬起而續序之曰族之有盛衰徙止之靡常者勢也而能世守宗桃不至淪散無□者非有道以統繫之不能也東陽巨族無下十數計其翹然挺秀久而克振者韋氏其首著已傳曰公侯子孫必復其始吾於韋氏亦云若夫廣孝思篤宗盟前序已備悉予不復贅會稽後學金慙頓首拜撰

萬曆丙辰續修原序

按史籍杜陵韋曲爛焉西都韋氏之盛以組綬累著者無論已其著於東邑也初基治之龍泉坊繼建文星坊爲今居址其俗尚氣節世守儒宗故邑之隆望歸焉夫受姓保氏疇非功德顯著者奈式微轉徙漸郎陵夷良可嘆也吾邑在婺越間距長安數千里中原板蕩之日代多流竄是以名臣碩士因官爲家其久且盛者孰克與韋氏並唐天寶之季有參軍諱履淳者登顯秩忤楊國忠遠斥海南楊敗稍遷內地量移東陽參軍公留滯久之鬱鬱不得志其子諱友直卜居焉量移之日李供奉贈詩三首惻悵憤慨不忍言別然豈料夫一時遷徙遂爲南遷之鼻祖也哉戴叔倫循吏也先是與參軍公兩相器重稍莫逆交雖公之行事不概見而供奉以文章節義憂絕當時跡其惓惓於公之放逐豈非以弗阿楊氏之冰山爲是其同病相憐也耶戴公供奉之流亞也窮視其所交知戴公斯其所交者可知矣今諦視其譜系草創於宋之助教公修飾於本朝之沐陽公而繼往開來世次犁然涇渭不淆者又穆然於元之處士宗文公也由是累輯累備脉絡分明生日繁而益親世日遠而轉密矣余與韋氏爲通家世好因修輯竣事故樂溯其播遷之由與文章節義之可以佑啟後

人者謹弁諸簡端賜進士出身通議大夫都察院右副都御史巡撫江西等處少薇許弘綱拜撰

康熙戊申重修原序

漢晉以前江東未表氏族暨劉宋再營建業而中州華胄絡繹居南文物聲名於斯日盛故邇世系於吾邑多本於大河以北若韋曲之著烈西京也延綿唐葉簪組相承至諱履淳公以直聲著天寶間糾彈權貴左遷海南量移東陽龍泉坊其始基矣彼其時雖陝洛風烟不獲接軫關內然亦樂此邦之佳秀可以寧畋宅而長子孫也茲歷八百餘年振繩蕃於東土謂非先猷之宏裕有以致此乎夫由唐迄今桑田屢改兵燹屢作簡編殘缺家乘幾無從考矣如我東之聚族蒙安無蕩析離居之患得以承先澤而示後昆者未始非幸余觀韋氏宗譜有源有委歲月之久近瞭如指掌蓋自助教始創於宋而元處士葺之迄有明兆淇光寅諸公復修於萬曆之季世系日盛卷帙屢增然距此又數十年矣自祖暨孫數傳未叙非及今綜而修之將後之視今能如今之視昔乎眉山蘇氏曰吾父之子今爲吾兄數傳之後不知何人此言譜之當修也今者應儒應隅應珏承元承鉉承鋒承訊承翱承彬承太諸公分司其事惟應隅用力爲多而吾友國森號戴晉者士濟字際昌者皆博雅士纂修彙誌共襄厥成以數十年之似續接千百代之宗支非賢子孫其能肩斯任乎夫唐之舒馮諸姓多爲吾邑名家往往宗譜無傳遂致淪逸若韋氏雖有散處蘭江及東甌閩越者披觀譜牒指示犁然則留心繼述當念萬葉同根衆事各爲己事徵文徵獻後之視今亦猶今之視昔是助教諸公

爲今日之先型而今之繼述爲將來之嘉範也已後學杜時蓴頓首拜撰

乾隆癸丑重修宗譜原序

余韋氏無二宗雖支派繁衍而皆繫郡京兆皆奉鼻祖於漢成王傳諱孟者故自余蕪湖而外若淮揚若西陲若浙江之東陽皆有宗姓然蕪湖之派發源西陲吾祖也吾知之即淮揚之發源於西陲也吾亦知之惟東陽去蕪湖不越千餘里而余以久宦於朝未嘗一泄其境而特藉知於故光祿寺卿華坪沈君及今相國王韓城公者蓋先是沈君曾以外艱歸里應聘掌東陽書院教事逮來京爲余道東陽韋氏頗詳既而韓城王公視學兩浙回京亦爲余道東陽韋氏甚盛且以所拔尤科門錄示余曰此名昌崇者東陽之秀此名洪勳者即其從叔也廷試來京君當有以接之已而勳崇二子果皆來廷試畢並充四庫館膳錄事時余職在總校勳崇恂恂執弟子禮惟謹直以館務旁午未暇爲二子一叙世系考先人分徙源委也越歲丙午余從西陲典試歸京歸官國子監有太學生名鉉恩貢生名家琳者皆余韋氏宗從東陽來詢之即前此勳崇一家尚未離五服也用於教習館中昕夕接叙備知唐李供奉詩所謂送韋參軍量移東陽者號履淳公實爲東陽始遷之祖且聞公初居龍泉坊越數傳徙文星坊故蹟至今可考夫自唐以來已閱千數百年而瓜綿椒衍日滋以大其不爲吾宗望派與今癸丑之三月家琳以教習期滿得粵西宰瀕行謁余曰敝宗方葺家譜昨得監譜事者手書屬請大人爲之元晏以爲家牒光未審肯一惠琳瑯否言已出所郵書并譜稿留示余余

閱之見其昭穆明法戒備繩繩以貫秩如整如廼知來書之列名志仁汝超祖聚景李五先夏宗魯輝藩侯輩皆其監譜族長善於敬宗而收族者也蓋譜法一本諸宗法宗法以大宗率小宗小宗率羣派等而下之也宗法以繼嗣者繼祖繼祖者繼高曾等而上之也其書之必詳者太史公世家列傳之例也其闕而不書者春秋夏五郭公之例也且其譜自己卯再葺以來家法益備以養士則有賢田以食貧則有贍田以婚娶喪葬則有嘉會賻賵之田且於遞月朔望集長幼子姓敬宣聖諭十六條以廣我朝文教單敷之雅以守先世花樹宗會之法由前言之則范氏義田也由後言之則鄭氏義門也一經舊德盡在東陽矣余雖耄已及之猶然隸籍朝端以備皇華之遣倘重膺簡命如前典試西□得以取道浙東與前晤諸君暨今來書諸君一叙棣華行葦之歡不又生平一大快事乎子行有日矣便道過家門其以余言弁諸譜且語諸君有學行優長可出而和其聲以鳴國家之盛者其即備公車來都門以覲天子光賜進士探花及弟鴻臚寺少卿歷任國子監祭酒四庫全書總裁山東學政陝西雲南正王考官巡撫貴州提督軍務加三級蕪湖宗裔謙恒頓首謹撰

嘉慶丙子重修原序

東陽聚族於城二十二坊者舊傳四名家今必右推文星韋氏矣韋氏簪紱隆盛甲天下其見於唐書世系表弗具述若迹始東陽法曹參軍諱履淳者彭城敬公後也參軍開元己巳第進士任丞相府都事以鯁直忤權相謫嶺南量移婺李供奉不難其行而慰以詩若或見之矣時從祖行有若諱湊者實始參參事已從子行有諱友信者

由泉吉刺吾婺夫婺唐以前由京兆涖吾甌未有聞至是一門輻湊獲有所憑藉者豈非金精且曜山川鬱奇天故將啟之以韋曲之盛洪亢扶陽載承休烈迹不在嶺南在嵇南耶嗣世諱友直者占籍東陽治北龍泉坊十餘禩第進士八人官皆顯越其徙於文星坊也以助教諱希顏者協修國史名在治東亦曰德潤間如知彰德判汚陽科中書代有聲至於今族屬蕃衍計凡三十餘世益大以昌去年秋慎重譜事魁占諸君輯修之將竣不鄙老詩來請言余欽韋氏久矣曩遊都下與翠庭魯庭昂齋五雲數君子連榻踰十年家世緒德用悉其詳茲有言無足以重簡端謹即前蕪湖所稱宗法譜法之義從而理之程叔子言凡人家法須月爲一會以合族花樹韋家宗會法可取也是法王伯厚以爲不傳華鄂之盛則岑嘉州七言古歌想見之揆厥義類毋乃月爲一會者即其法耶今韋氏家置賢田以養士贍田以食貧及置嘉會賻賵皆有田仁浹義至籌畫詳盡相率以禮訓用鄉先哲呂成公法家會之舉吾於韋氏無見其難矣譜之作也廬陵依史遷年表眉山依禮大小宗爲次後世通取之如助教創於前元處士明沐陽令繼於後皆其兢兢然不與古悖者也顧黃門郎挺公與高渤海岑鄧州纂修氏族志其時參考史文檢真僞進忠賢崇舊望去取號稱允當夫志一族與爲天下氏志無二道也繼事者世系之奠例仍其舊若夫徵考文獻彰信而闕疑咏德駿烈職容委謝閎之以淵覽體之以冲虛家學懋美如氏志然吾前見教於數君子卜之復奚疑乎然則光耀者麗宿火實遂者燁盤根宋文憲言東陽古著姓八今有不可知者矣韋氏本京兆中州膏腴衍啟東南吾固信之於天以知其曲有所授前徽奕然今乃得理蕪湖之言於後

者是其爲東陽右望其證矣遂書而歸之誥授奉政大夫賜進士傳臚日講起居注官實錄館纂修尚書房供奉前翰林院編修浦陽戴殿泗頓首拜撰

道光乙巳重修宗譜原序

譜之體例權輿周官小史其見於紀載首推韋氏隋仁壽中逍遙八子蟬冕符節稱海內甲門時梁開府嚴侯叡孫鼎緣相術授上儀同三司文帝問與世康遠近對以宗族南徙昭穆非臣所知詔謂百代卿族豈遽忘本命官給酒肴遣世康請鼎還杜陵鼎考楚太傅孟以下二十餘世作韋氏譜七卷此殆韋氏有譜之始抑名宗諸乘未能或之先也而漢安公猶子易州刺史挺在貞觀朝又被命與儒臣責天下譜牒參史傳進忠良舊望甄差羣姓號氏族志薈萃鄧氏官譜何氏姓苑諸書體例衷以抑揚夫以譜天下者譜一家譬學裘於冶學箕於弓在師其意而已觀乎桃符之放後爲黃犢子知其嚴良賤防未然殊有深意員外家花樹歌嗣響常棣之詩想見綴食勿殊禮文未墜古今宗法韋氏具備後有作者用高曾之規矩而奚以他求爲吾東韋氏鼻漢丞相節侯傳而東眷而閩公而彭城曾孫諱履淳者量移婺州法曹司戶參軍至東陽子孫占籍爲著姓與余族締嫁娶溯自勝社至今益稠以篤鄉獲遍交其族彥比官秋曹峴樵中表課夏連榻京邸先通議公或覲縷親串情話夜分不能休繼客備兵漳南幕因是於東眷源流支派暨譜之創述得耳其詳乙巳春郵書日下其言族叔仙槎偶一贊甫襄從況竹垣踵奚斯益曼碩其寢旋設局操觚肩譜事溯上次纂葺終二星且五稔生際太平齒易繁衍

增舊帙十之二太藏事將告於祖請有以弁其端竊維參軍公華儕清第倘委蛇以取容豈難躡躋卿相顧與高侍御李供奉諸詩人契洽讀二子贈言殊不屑憑籍門戶其土視塵視氣象宜要津若將墜諸淵一斥不復振而不悔寓公子遺不絕如綫累代潛德勿耀趙宋舉進士七人明有京曹大令丞倅佐貳參戎總戎國朝旌典疊膺仕版科名項背相望游璧類聯襍如林散處於十四鄉計竈以千數長少行輩想懸至九世爲問世系表九房之盛雲仍胥與醜夷不詘一時而伸千載彼蒼之玉汝積久彌彰辛廖不言乎公侯之子孫必復其始然則詠駿烈誦清芬推廣修譜之意尊祖敬宗收族不置以錫類垂裕後昆將家稱郎官人樹杞梓不難接武華胄時望國籍之選勒成書藏之秘府爲衣冠顧矚南史所錄豈遂專美於前哉誥授通議大夫賜同進士出身候補內閣侍讀學士前湖北按察司使署湖北布政司使世姻晚鹿峰程銓頓首拜撰三十世嗣孫昌壬沐手敬書龍飛道光二十五年歲次乙巳孟秋月上澣之吉

同治丁卯重修原序

京兆韋氏古風姓也顓頊孫大彭爲夏諸侯封於豕韋其地滑州韋城周赧王時徙居大彭以國爲氏漢時曰孟爲楚王傳徙居魯國鄒縣四世孫曰賢丞相扶陽節侯久徙京兆杜陵傳十世穆稱東眷歷後魏周隋至唐代不墮僚唐書宰相世系表言之翔實矣二十二世諱履淳婺州法曹參軍以開元己巳第進士鯁直忤權相謫嶺南量移婺州吾家供奉有詩贈之所謂全勝若邪好莫道此行難者具載集中嗣世諱友直者占籍東陽治北龍泉坊世代屢更子姓蕃衍歷

今千有餘歲其家乘之作始助教公諱希顏者迨元處士諱朝者稽

史傳攷世次作外紂至參軍公以下爲內紀自時厥後代更修輯夫

自宗法不講九族之親漫焉不相統屬若秦肥之視越瘠漠然無所

動於中俗之偷也古者閭史書名家有簿狀上之官卽令史掌之司

馬遷作世表旁行斜上並效周譜唐柳芳韋述路敬醢言氏族甚詳

韋氏之先累世隱德在宋登進士第者七人有明一代京曹大令丞

倅佐貳參戎總戎不絕書我朝雲漢作人醴泉甘露覃治士林有以

武功奉旨賜隋征守備者曰士吉純孝旌授州司馬者曰名位舉人

任鹽大使曰誠由恩貢任廣西天河縣知縣者曰家琳登拔萃科授

州司馬者曰洪勳曰昌崇進士任直隸隆平知縣者曰崧杰父子登

右科者曰棠曰標其貢成均者饒於庠者泮水藻芹肩背相望至於

闔門雍肅以嫠婦守節得旌典者數人可謂盛矣耆年碩德童稚恂

恂孝慈友恭天與我民彝無忝厥祖矧夫養賢有田優俊髦也周急

有田恤貧困也敦宗睦族之義周詳臻至諸賢達所以仰體祖宗意

而聯屬之而親愛之者何如其厚乎丁卯暢月重修譜牒告成董其

事者霽鑒炳奎□信佐清乃廣恪勤厥職明世系辨昭穆詳登下謹

婚嫁珪分璋合釐然覲然以宋爲束而芊爲羊咸更正焉闕者以補

渙者以萃浸昌寢熾吾知其未有艾也芳與崧杰同年進士且與韋

氏世有姻連以弁言屬不獲辭遂序之龍飛同治六年歲在疆圉單

闕律中黃鐘之吉賜進士出身誥授資政大夫內閣學士兼禮部侍

郎前翰林院編修侍講侍講學士詹事府少詹事道光己丑會試同

考官辛卯雲南鄉試正考官提督雲南學政內申會試同考官丁酉

再任雲南學政辛丑會試知貢舉官姻世晚李品芳頓首拜撰三十

二世嗣孫尚經熏沐敬書

乾隆己卯重修跋

家之乘國之史也用以別昭穆明尊親垂法戒而一宗族也韋之著姓於東陽自唐天寶歷世最久簪纓奕葉人物輻輳稱盛族焉而族之盛者支必繁故自龍泉文星二坊分居於鄉里者星散蕃布未易統集是以歷代有重修宗譜之舉渙以萃而分者合統之有宗會之有元也予觀夫世系支派之圖與顯迹隱德之傳序碑碣文章經術溢於簡端其原原本本恍如黃河之水滴滴歸於星宿何其盛哉但歐蘇家法以五世爲率茲乃恐服盡親盡而以三十年爲一世宜越一世而再葺矣無如烟居遼遠支派愈繁不能驟集我朝自癸未重修歷年曠遠庚午之秋間有各自成書如崇禔拜汾陽之墓其能辨諸是舉也定冊三十集成語以爲綱將來會譜之時如珠之聯如璧之合所以垂法戒而一宗族者悉本助教沐陽詣公之心以爲心而杜陵韋曲近天尺五之盛更可拭目俟已模誼托葭莩不揣樗昧披閱是牒不猶觀太史公世家列傳而目改耳化也哉是爲跋時乾隆屠維單閼之杪秋也南岑後學吳國模喬林氏拜題

顯一宋承事郎領糧料事學古公傳

公姓韋諱儒字學古唐婺州參軍履淳公九世孫父思佩挾藝不售德淑一鄉學古自幼領庭教知所向往資性明敏不欲爲轅下駒益充經笥茂文苑登進士第見中原擾攘思出無爲隱居林下會同罷宋澤公奪爵羈置鎮江躡屨往從之凡六七寒暑不欲棄去即舉足

來旋靖康丙午汴京失守忠簡公以薦起元戎佐康王構於湘州得以便宜署屬吏檄學古權領糧料事轉移芻粟以佐軍興一時規畫汔有程度高宗即位從忠簡留守京城以收王善功得授承事郎領糧料如故時汪黃別事忠簡每上疏言事抑不得請因嘆曰天下事已如此不去何待遂謝歸僚家憫其志相率祖以詩忠簡公曰三年同洛陽塵冠吹北風謝次山曰寸心不逐寒燈燼夢裏驚呼敵已降蔣芾曰河北風塵白日寒夢魂還復到長安趙寶臣曰直節要陪秋菊晚丹心還抗曉葵芳諸作忠憤激烈讀之可想見其爲人矣已而忠簡公疽發背卒人咸謂知幾學古奉親祀先處友教子率不背於道而二聖在北尤扼腕涕淚惓惓不忘忠簡公之死痛之終其身予爲太府少卿時學古子惠爲少監具言其父事甚悉至是請爲之傳輒序其槩以俟太史採采紹興癸酉仲春之吉樞密院都承旨前戶部侍郎同郡葉衡撰裔孫道緯人品類纂文學類韋儒字善己東陽人少負氣放逸善讀書從陳同父亮游亮被誣同人無申之者儒與同郡喻南疆不避艱險竭力懇出之以宏詞科官大理寺未幾歸家人西峴法輪寺著書至老所著有漢官儀體倣周禮又作隋書傳註補註音訓凡二百十卷憤宋偏安以隋能統攝土宇故特詳之又纂建炎以來攻戰守禦之具名曰中興樞務其書類指和議之非當時避之自號拙齋居士足不至城市者數十年年八十四乃終道緯按公所著之書皆屬憤時嫉俗之爲使能秉國而展其所學宋未必終於南也雖然當是之時若秦檜湯思退韓侂冑羣姦相繼雖有善者將如之何不若日與楮墨爲伍自伸其憤於寒齋冷榻之間也迄於今著書之名尚存抑亦可以文章爲勳業矣

盛二十四明拱公三代義士傳

世之克昌厥後者必先有德以基之而後子孫得長享其餘澤也若累世及人以德則尤難愬譜章宗其宗之盛者莫盛於明拱翁之子孫一日宴會宗老曰世期者年八十有六矣爲予言曰明拱翁諱釋文子曾叔祖也曰禮川字伯源者翁季子予從叔祖也予曾祖原備翁註誤隸戎伍當之茶陵衛衛去家二千里有奇每東望如赴湯火恨無預其難世於戎伍事率規避爲自全計雖父子不相顧至有長子補父籍而諸季爲民者明拱翁義重同胞情深友愛慨然謂原備翁曰事不避難弟子職也手足一體予得辭戎籍哉遂輕裝以從比來旋率諸猶子治產業相與供衣履終不圻籍自便既而原備翁逃伍律當徙邊遠改隸北直隸撫寧衛去哀城七百餘里人有憚行既抵伍歸當越重關久之不相聞會明拱翁五子字伯雨者以恚忿忤宗人宗人懷其恨欲中之告翁家尺籍應解補伯雨翁兄弟四人皆長健率難其事長兄伯中翁自公無可諉獨伯源爲少番代當不及且新婚朱安人懷妊甫三月然其性倜儻曾不少顧伯中翁將行請以身代謂諸昆曰此行生死不可知婦即生男女當舉以嗣吾後伯中翁深感之衆相與贖以四金伯中翁獨贖一金然前告伯中翁伍事者例當與俱伯源翁濱行其四兄謂伯源翁必伺隙而甘心焉乃足以報當留贖金以爲信伯中翁因取□金藏之家伯源翁無難色毅然躡屨往抵撫寧籍不失伍往返歷七月餘中途微示□意彼人具解所以深德伯源翁既旋歸伯中翁喜不自勝比家五都之芝塘具酒邀伯源翁劇飲歸甫三日人來報伯源翁得子伯中翁益大喜

齋前贖金并厚具酬賀所生子即予從叔仲本翁也初伯源翁賈資遊赤城遇一嫗鬻女者其容甚憾心異之詢知其夫曰劉邦佐山東沂州人任台州廣儲倉使折糧繫獄鬻女以贖夫罪翁惻然傾囊與之女却不受既而仲本翁長系世充給益大燕貽每蹤跡先美思有所繼述以延休緒弘治初燕人薛巡檢蒞任未兩月而卒鬻女辦喪具仲本翁聞之即給以贍老衣棺未旬其子復故仍買衣棺爲殮葬嫗感泣遣女事仲本翁不受如其父且厚贖之越數歲鄰家火起出避暮夜愴惶墮井中翁年且六十六井深四五丈人無知者雖少壯卒難超脫不覺其身忽在井上率郵傳謂有神靈相之者是其累世積德所致云愬考韋氏家乘見三翁墓誌銘凡其立身行己居鄉治家之美善皆已紀載無遺獨遺此三事嘖嘖尚在人口故謹掇所聞而傳之如右以爲後來者告焉會稽金愬頓首拜撰

盛二十六全明公傳

君諱福祖字全明美丰姿少登甲第因亂退歸林下常遊西明□遇異人授以步天窺斗之書君資性敏慧穎悟出人由是晝夜觀玩精究其理凡所推徵靡不的中洪武間青田劉文成公再赴召過發知其所學謁之與談喜甚嘆曰不意此時猶有異才潛伏若此者豈可使之終爲草莽中人乎拉與偕往薦於朝爲天文官居欽天監每援象緯陳時事之得失言詞愷切建文帝常優禮之已而從太宗文皇帝北遷卒於濟寧之旅邸上嗟悼不已敕與諸死王事者並禮葬南京城外一舍封而樹之特設內臣守護時具祭祀仍令子孫世襲其職以是其子瑾暨孫賢贊輩俱受祿於朝不替遺職云天順三年七

月朔日中書舍人吳熙淳頓首拜撰

壽九十六節婦金氏傳

節婦金氏女諱貞韋公格字世正者之元配也其治家也勤其事舅姑也孝其相夫子也順世正兄弟凡六人處妯娌甚和逾十年而世正卒氏年二十九朝夕哀號幾於骨立子藩甫九歲撫之如掌上珠誓不他適去塗澤服簾素紡績織紉以養舅姑及舅姑逝有利其所至百方窘逼以強之而石介如故雖飢寒困苦確如也迨藩稍長親撫教之爲配陳氏女輩不墜韋宗以延夫祀未幾藩復早世家益中圯藩一子茂方在乳哺幾不能全活賴氏多方鞠育是祖母而兼生母也里中人相與嘖嘖嗟嘆曰貞哉金氏不愧斯名矣享年八十有三以無疾卒於嘉靖乙巳年十一月之□日時以爲惠迪云愬譜韋宗與聞其美竊冀其族之賢人君子與邑之學士大夫有請旌典以表其門者乎予不勝欣慕焉會稽金愬頓首拜撰

循一百一十四一泉公傳

予自駕部還蜀便道歸省邑中韋德良求予爲其尊人一泉翁傳家大人曰此吾故交也其無辭予曰唯唯憶垂髫時家大人庭訓往往舉布衣砥節足以模範鄉人者示予予聞一泉韋府君之名素矣府君諱英字拱華別號一泉早年失恃以不獲報劬勞每一念及淚簌簌下也於是旦夕事父務有以得其懽心既喪哀毀骨立繼母楊性好浮屠計所施捨歲費百貲府君一以愉色承順未嘗少忤其訓子

義方常使就正於羣公先正吾伯父南庵心庵太冲諸公皆屬契交即問爲治生計未嘗屑屑錐刀之微嘗曰不饒於德而饒於身何爲者公祠雜於囂塵址裔而制庠謀之同志聚族衆而告之曰吾儕居室互爲爽塏追昔啟土貽有安居伊誰澤也囂非所以展肅庫非所以容衆乃俾先人寢廟而逼於溷室乎衆然之卒成公祠於雙泉之東闕宮之恤翼然煥然迄今歲事無替微府君之力不及此爲人重本崇義大都類是公生嘉靖壬午八月廿二日卒於萬曆丁丑二月二十日享年五十有六配義烏霧溪陳氏恭慎勤約多內助功生嘉靖乙未十月廿四日卒於萬曆戊申六月十一日享年七十有五子五長德賢娶何氏次德良娶靖安二尹錦溪盧丹山公之女三德方娶霧溪陳氏四德正娶華溪虞氏幼德科娶金氏繼娶河南宗伯松澗金公姪女又聚象塘樓氏女三長適何兆棠次適霧溪陳祖德三適安樂鎮巡司峴北周百光孫男十一應文應武未及娶而早卒應斌娶斯氏應隆娶傅氏應田娶陳氏應璧娶趙氏應進娶樓氏應陞娶程氏應階娶陳氏應際娶葛氏再娶盧氏應隅娶貢生郭守益公孫女孫女五長適王立松次適虞宗元三適陳堯平四適張國彥五適邑庠錢忠諫元孫濟濟正未有艾云萬曆歲次庚戌仲春上浣之吉年家眷弟趙賢意拜撰

循一百七十六鍾岳公傳

君姓韋諱光宅字可安鍾岳其別號也天性聰穎倜儻不羈強□自遂好讀書博通今古爲古文詞數千言立就以葩經補邑庠生雖習舉業而於帖括不甚鑽研亦不屑絺章繪句以趨時好直抒寫其旨

意而已縣丞廖公署邑事上丁釋奠諸生齊候習禮日晡不至獨君正言以糾其失廣陵蘭臺應芳陳公提督兩浙學政訓飭多士條教最爲詳悉君獻四事復出其意外大加稱賞尤善於言譚吐詞清辯偶語戲言皆有理趣至今人相傳述以爲徵詞居城中時樂工有躡雲履而入市者君見之立命左右取刀截其雲而去兩街之人相視大笑以爲快嘗遊武林遇諸將校於湖上與談輶鈴之事衆欽其才欲薦之督府留爲中軍總力辭而歸放情詩酒以終其身尊人城山先生素有詩名君與季弟光寅承籍家學自爲師友俱以能詩稱於時卒萬曆壬寅正月仕五日距生嘉靖甲辰十一月初四日享年五十有八有詩文若干卷藏於家配俞氏生嘉靖戊申十月十一日卒萬曆己未四月十五日享年七十有二子四人浚明旭明英明望明孫男四人皆未可量光潛德者其在斯夫敢略書一二以志其實時萬曆丙辰四月八日也年家眷弟趙賢意拜撰

循二百五源泉公傳

文學諱光容字可治別號源泉先尊公號養泉因爲號焉幼穎悟入小學讀書成誦輒曉大義淹貫諸史矢口而談往古世代人物治忽臧否之較瞭然在目鄉先達重加許可比遊黌序諸生咸自以爲不及竟奇於數亦恬如也行己和而有節好爲義舉有弟負課百餘金易己產爲之代償二親之喪亦不與均其費朋儕過訪必置酒劇談情致款委無少厭倦至遇盈庭之議一斷以理稍弗當心即明折之衆頗嚴憚他若泮橋之修宗祠之建皆與有其勞嘗從王全吾學

王後守興化遣人邀至治所自冬歷夏朝夕接遇不忘醴酒之設益深投轄之情久之廼還然而感冒霧露遂以勞頓成疾矣卒於萬曆丙午十二月二十九日距生嘉靖甲寅四月廿一日娶三都和塘樓氏德性溫順勤已克家稱賢內助生二子二女子啟明思明女長適同邑布政司知印馬鳴廷次適義烏華溪虞可成壬子歲冬予自婺還啟明屬予傳其事故不辭而書之如右年家眷弟樓一鼇拜撰

循二百三十七安人應氏賢婦傳

應氏諱金年一十八歲歸于韋諱光梅字拱芳者生五子文璵文珍文瑜文玘文環女一貧幾不能自存梅遭疾奉侍彌歲情極其摯日夕籲天願以身代梅竟以疾卒哀毀骨立喪葬如禮忌日輒抱主慟哭氣絕者數四服闋後時痛所天間里憐其貧苦而多嗣無愁嘆聲甚善之乃未幾而文珍文瑜文玘又相繼而亡僅存者次若幼耳每愀然嘆曰果能撫以成立尚與千鈞一髮者不同顧天道不可知而文璵又牀席困之當此時其能一息安乎日暮途窮棲息靡所北風陰雨之象誰能堪此而氏皇然曰門祚若此非教子義方不足慰泉下心也廉其事果如其言至於孝事舅姑和處妯娌尤其賢之先見者以羨餘娶婦蔣氏及應選應進生始有喜色乃欣然曰而今而後無容爲夫子慮矣環穎異克家善於承順而家政仍出氏手亦其氏之懿德不回也迨其後頤養以終餘年子母婦姑從不聞詬誶勃谿此事豈偶然哉生於萬曆庚辰年六月十五日子時逝於康熙壬寅年九月十四日酉時享壽八十有四尊自揣不文豈能表揚壺德者第屬在梓桑耳聞目覩者久之不能不筆之於簡以俟後之能文者

康熙七年桂月望日之吉年家眷弟杜時蓴拜撰

禮一百五十一體信公傳

三代而下未嘗無古人亦未嘗無古治特以沉滯下僚者無由表著故史冊多略而不傳以余所聞韋體信先生諱中順者其始以道業自重及與昆季同遊太學言行爲公卿所推重都人奉師範焉初授徽州參軍徽富郡也先生獨秉介操以清潔自持不數年遷保定參軍趙地夙爲盜藪先生感之以德使力敦孝悌風習頓改其時名高薦牘終不屑隨勢俯仰再遷閩之建陽衛綜理屯務多所釐革軍政一新蓋以實心敷實績在位所謀與柳下之仕魯城無以異繼判沔陽聲望益著沔爲四方走集之地俗繁侈尚氣先生以靜穆鎮之士女式化厥訓故理煩劇若迎刃焉適軍事旁午勞瘁日增以老歸里令終於家時年七十有八元配木香李氏子男三長應佩次應佐幼應佑孫男承光承鴻承編承元承先承綸承浩承綱承完承泮承旭承涵克誦清芬勿墜厥緒余追覽華族家乘嘆慕淳休異日當採列誌傳以爲郡邑光年家眷晚生杜時蓴頓首拜撰

榮八十九峴峰公還金恤患傳

東陽韋君峴峰名應祖字國武與予舅氏方君思隆郎舅也幼讀書多見聞明義利恤患難尤好經商天下省直遊幾遍度本收息曾不多取與交者咸知其爲誠篤之士弱冠時行商由處及溫暮止西郭之旅樓時投止者蜩集聞鷄旅衆畢往惟君俟潮起晏方披衣見對榻枕簟之下如有物狀趨視之見一小囊啟之則白金十數封約三

十餘兩因嘆曰斯人何不謹若此遂收之以待辰刻潮長舟師促行君給之曰期友未至未便登舟也日西照見一人張皇而來登樓起褥頓足曰休矣休矣君詳詢之彼泣曰不肖枕戈於閩六易星霜矣止積餘餉半觔持歸膳父餘一觔有奇皆戎伍中附以寧家者今早去速遺失枕下餉午索錢知失忙奔至此已無及矣已物不足惜其如便附者何君知其不妄乃曰訂期今下瑞安起見汝物知必返求故停舟而待即挈囊還之遺金郎叩首曰不肖咎在不慎累君久羈非君垂憫則父子不相見附寄無可償自訣江中魄耳再造之恩何以爲報遂揀膳金酬之君固辭不受曰予若利此早已順流而東矣何以待爲觀者如市相與驚歎以爲少年得此誰不利羨其家尚肯還之乎又肯久而待之乎庠士王光卿輩相率賦詩以贈行焉越月貿易已竟自瑞安還至雙門買舟西歸羣坐篷底中有孫良雲者笑語間知其爲烏傷人念其同鄉與共寢食至處之下河登陸見其身熱倦於步趨扶之而行延至邵金館熱甚迎醫視之知爲痘疹不可以風君憐其囊空影隻棄之必斃遂留與俱護持惟謹逾三日旅翁恐其貽累促之君即發已貲倩輿親送還鄉途約三百餘里計費頗多至則□其室如懸磬遂不責其償而歸後五載遇於湖塘市間固邀之□男婦稽首稱謝向非大恩垂憫作溝渠殍耳今之句延君之賜□方知君之居址後餽微物踵門而謝壬寅間復遊河南江潭洞□場開典以通有無見鄉人李信卒於疫君憐其亡於異域厚其衣棺以禮收瘞復請黃冠超薦之時人大贊其美回復詳語其子往迎歸殯其家感謝無既君爲吳寧著姓素聞令大父令尊君善聲洋溢屢膺郡邑旌異而令君之善行種種超羣可爲善繼善述者矣嘗聞

積德者後世其興君當預大其門閭以俟高車駟馬可也予忝姻末稔聞其美敢效昔人介善作傳之意故錄其事而贈之以爲世之貪殘者勸并以俟後日太史輶軒之採萬曆甲寅仲春之吉賜進士出身中順大夫知湖廣黃州府事眷姻姪王世德頓首拜撰

榮一百五十三國瑞公傳

吳寧韋公行榮一百五十三府君泉州郡大總戎仰泉公叔子也諱應斌字國瑞別號越然生九歲失怙事母何氏純孝性成處兄弟友于誼篤家庭巨細事不敢他諉焉比丁母艱雖痛哭備至柴毀骨立而喪葬大事無不盡禮此固其孝友之著於家者也居常讀書不以問世家有積貯每以濟人世居梓城里處城市恬若山林嘗曰讀書貴明理義耳窮達何足爲重輕有財貴好施耳吾豈爲守錢虜耶自是高卧北窗優游恬養篤於信義嘗爲鄉評所推重且足不履長吏之庭而一言可以排人患難身不膺華臚之貴而令聞足以爲宗族光其大節較然如此公有兄二人長曰應文次曰應武弟一人曰應進皆無所出公娶暨陽斯氏宜於厥家一女適峽溪虞氏一子曰承諫字君規號鼎臣予同盟兄弟也公嘗於就傳之暇庭訓子曰予家世累善以至汝大父乃克叨命顯揚不幸而伯叔輩舉孕悉艱我獨承天眷以有子也祖宗奕葉之關皆於汝乎賴敢不勉自負荷以貽先人憂此又其義方之凜然不苟者矣公生萬曆乙酉年三月廿五日辰時至順治戊子年七月初五日乃卒享年六十有三德配斯氏生於萬曆己丑年三月初九日卒於順治丁亥年九月廿四日先是卧病不起其子鼎臣君侍奉湯藥倍竭至誠鄉里老成尤重之嗚呼以

公行誼之賢而又當此繼嗣絕續之際獨能承前啟後自非積仁累行焉能弗替先烈以至斯哉予生也晚未獲識公之面幸而雅善於鼎臣君世稱不知其父視其子今觀鼎臣君之賢早列黌序而多才倜儻意氣豁達則公之義方式穀所以垂名後世者益可徵而信之矣茲因家譜纂修予雖不文幸與冢君同契安敢不表而出之以壽諸梓古麗州觀政進士通家晚生俞有斐頓首拜撰

榮一百七十九國晉公傳

公諱應陞字國晉禮一百四十八之仲子子也少端慤不爲戲狎稍長習舉子業銳然以賢聖自勵廼屢試屢蹢嘆曰國家求真才而用之士宜以真應苟無當於用即開第康莊之衢結綬人主之前終眇小丈夫耳於是屏去時尚居身渾樸以至誠持己以寬厚待人凡鄉鄰有違言咸賴以贊成視所曲曲者之視所直直之雖蝸角之爭蟻穴之戰刺刺不休者亦各渙然冰釋性至孝友肖泉公有疾中夜禱天祈以身代天感之而藥力漸效卒以延年分財產互相推讓不爲世俗之骨肉路人者邑著其聲族高其誼羣相尊敬推爲祠長有裕蓄公主其事無染鼎之私中正自持無偏徇之曲其行事可傳於後世予焉得無一言以壽之公生萬曆己亥年四月十八日亥時卒於順治壬辰年十一月初七日戌時配十五都鹿峰程氏安人生於萬曆己亥年八月二十八日未時賦性和柔貞良允協治家以勤儉教子孫以義方至今健步善飯所云□者壽而坤德厚載視此矣子一人承明娶傅氏孫四長道毅娶周氏次道立娶任氏道奇道章皆頭角嶄然孫女二未字是皆公生平種德之明驗也予不揣疏陋而持

爲之傳中憲大夫湖廣常德府知府眷弟王嘉亮頓首拜撰

華一百三十五瑞吾公傳

公諱承紳字文榮號瑞吾韋氏自參軍公徙居東陽代有聞人公其二十六世孫也幼讀書長敦禮讓以數奇不偶遂屏置舉業廢著鬻財能擇人而任時家貲日以饒然務辨別淄澠非分所應得纖毫不取也蘭江有同舍人徐廷鳳者落金三十餘兩公獲之徐入舟儉篋始知意舟子藏贓索之甚急公適至曰無以渠爲第言之不爽金固無恙也徐語失金狀公即舉囊囊壁徐徐大喜割其半以謝麾弗受又有李杰者貿易於公倉猝馳去遺其金於地往來雜還囊爲污泥濺矣公拾得審視知爲李物也詣其家還之生平類此者不能殫述然性不伐善遇其人未嘗有德色人不問及亦未嘗舉以自明以故遠邇皆嘖嘖瑞吾翁長者予時與諸生評□東邑人僉道公之事親也孝事長也敬待諸昆季甚友愛而處里黨也甚和且惠縷縷爲予言之公居族于兄弟行最長族有周處數輩遇不平事輒逞少年意氣但聞聲咳輒愕然曰大兄來大兄來急遠引避去或有爭訟長吏不能平者公爲剖其曲直率皆心折事輒解其嚴正公平爲宗人所畏服如此歲鄉飲邑中紳士以公德行聞當事禮請爲賓辭不就曰吾無德以堪也逾年再請再辭越數年又請不得已往赴焉年七十矣又三年而卒人皆以爲厚德宜膺寵錫云先娶木香李氏生二子德履次超郡庠生繼娶雅溪盧氏公歿而二子事盧如李秉公教也孫五人公所及含飴弄者今且有孫十二人曾孫六人其長孫名雲以弱冠遊泮旋食廩餼名噪文壇餘皆循習詩禮玉立蘭芽稱克家兒

也公之瓜瓞可謂盛矣予慕公之爲人且以樂公之後昌熾而未有艾也於是乎不辭譴陋而爲之傳康熙丙子三月既望會稽年家弟董肇勳頓首拜撰

華一百三十九敬泉翁傳

韋君號敬泉者行三諱承伸尺五名裔也娶木香李氏生子德濟而詠朝雉于飛矣復因兵燹徙居臨安不价士宦適志林泉故號曰敬泉然其生平慷慨好施更慕和靖遺風宅于西泠心焉素矣居杭繼娶楊氏舉丈夫子二曰德□德淋君皆以義方教之身修型之應成偉器於世而勿替其先業也耳君少時孝著於庭愛其長而敦其弟和族睦鄰均其餘事及君之長謹飭自持爲一鄉忠信之士至國朝鼎定之初爲人排解者又不知其凡幾也出贏餘以濟危困罄囊橐以贖難婦約計之二十有七茲故勿詳臨安人士無不敬其德而沐其休戚云敬泉翁偉人陰德耳鳴非以市惠而邀福也高閭植槐不在其身在其子孫吾將爲韋君慶矣然嘉禾約近武林余昔高君之義雅道君之德已樂爲之傳適翁次子德潮與余姪登春有通家戚誼因介紹于余述公行狀懇爲之序余以不文辭今潮以族譜告成又不遠千里堅請如初亦孝德之一微也敬翁足稱有子矣謹爲之辭聊以誌公之行備採風者之選擇云光祿大夫吏部尚書年家侍生杜臻頓首拜撰文林郎山西平陽府汶縣知縣眷晚生杜登春頓首拜書

華一百五十三君能公傳

韋君諱承廉字君能號瑞宇生萬曆乙卯七月二十日子時明□公

之第三子也性倜儻公直無私遇事輒揮霍有智不以錙銖自累稍有所得即呼朋暢飲飲必盡醉方之晉劉伶畢吏部與投轄之陳遵君其四也配安人任氏誕丁卯年十二月廿一日亥時性淑而柔德重而謙委婉順夫剛方訓子詩所云雜珮以贈雞鳴以戒惟母有焉且年至中葉條爾悟空潛心香國凡事必登之於上乘而不與世人儕生一子一女女適大園吳雲華子名德壽娶華溪虞氏子孝婦順蒸蒸有興起之象焉爲之贊曰天厚其質兮孰能摧之使不剛天充其氣兮疇能抑之使不揚忠良合質兮得失情忘志有所歸今朝夕醉鄉富貴不淫兮貧賤是安啣盃長嘯以樂志兮區區容膝而猶寬或中情之未暢兮向空門而盤桓如嫩寒與春曉兮探梅雪而跨銀鞍康熙七年歲次戊申季冬之吉眷弟王德圭頓首拜撰

華一百五十五允大公傳

先生庠諱廣字允大榮一百四十七知印成義公之令嗣也成義公庭訓甚嚴內助昭仁許安人爲司馬姪女善持閭教共相玉汝歲延名師課業無間朋儕雅集盛供具爲竟日之叙蓋親賢友善無非爲曲成其子計也故先生總角時即能屬文落筆驚儔偶十三補弟子員名噪詞壇人咸以大成目之娶孝烏赤岸馮氏優四德稱淑媛舉一子命名以□字子英當其弱冠蜚聲黌序而志量固已遠矣爲人慷慨仗義遇事直前解紛排難毫無懼色督學使者按郡掇籤講書先生振聲朗朗始終源委條貫徹如衆驚服其才使獲富以壽年其門祚之興當不至中落亡何事變中來早歸泉土惜之者以爲負不